



Äntwert vum Här Inneminister, Léon Gloden, op d'parlamentaresch Fro N° 3641 vum 11. Februar 2026 vum honorabelen Deputéierten Dan Biancalana zum Sujet "Introduction de tasers au sein de la Police grand-ducale".

1. Wéi gëtt déi aktuell d'Testphas bis 2027 konkret dokumentéiert an evaluéiert? Wéi gesäit d'Auswärtung vun dëser Testphas aus?

Während der aktueller Testphas verleeft den Asaz vum *Pistolet à impulsion électrique* (PIE) follgendermoossen:

Nodeems de PIE reell agesat gouf, schreift de concernéierte Beamten e Rapport, deen, zesumme mat der rechtlecher Dokumentatioun zu der concernéierter Affaire, un de Parquet weidergeleet gëtt. Zousätzlech dozou féllt de Beamten an der Testphas en interne e "*Questionnaire d'évaluation*" aus, och dann, wann de PIE just aus dem Etui gezu gouf.

Dëse Questionnaire enthält ënnert anerem Froen zum Kontext vum Gebrauch, zu senger Ofschreckungswirkung, zum Fonctionnement souwéi zu de méigleche Suiten nom Gebrauch.

2. Wat geschitt nom Ofschloss vun der Testphas, a wat ass dat konkret Zil vun dësem Pilotprojet?

D'Decisioun iwwer de Suivi no der Testphas hänkt vun de Resultater of, déi observéiert goufen. Déi intern Analyse gëtt zum Schluss vun dëser Phas mat menge Servicer an de Policedirektioun ausgewäert.

De But vun der Testphas ass et, d'Opportunitéit vun dësem Moyen de contrainte z'appréciieren, fir ze kucken ob de PIE definitiv bei der Police adoptéiert gëtt. Dës Etapp déngt ënnert anerem dozou de Gebrauch am operationellen Asaz z'evaluieren, a fir ze bewäerten ob den Effet proportionell an efficace ass.

3. Wat war de Kontext, respektiv wat war d'Natur vun de Situatiounen, an deenen den Taser gebraucht ginn ass? Wéini gëtt en Taser gezunn, a wéi eng kloer definéiert Critèrë respektiv Asazleitlinie gëllen an dëse Fäll?

D'Situatiounen, an deenen de PIE kann agesat ginn, spillen sech an engem restriktiven operationellen a legale Kader of, notamment vum Gesetz iwwer de Waffegebrauch ("*loi modifiée du 28 juillet 1973 réglant l'usage des armes et autres moyens de contrainte par les membres de la force publique dans la lutte contre la criminalité*"). De PIE soll net als neutraliséierend Waff gebraucht ginn, mee preventiv als sougenannte "*mesure préventive de sécurisation*", entsprechend de Prinzipie vun der Necessitéit, der Proportionalitéit an der Legalitéit.



An zwee Fäll gouf de PIE zur Eegesécherung gezunn, fir Persounen ze securiséieren, bei deenen d'Gefor bestoung, dass si eng verstoppte Waff (arme blanche) dobäi haten. Dee rezentste Virfall war den 28. Februar 2026, wou de PIE net nëmme gezu gouf, mee tatsächlech zum Asaz kouw.

4. **Wéi gesäit d'Schoulung vun de Polizisten am Ëmgang mam Taser aus? Wéi laang dauert dës Formatioun, a wat sinn déi konkret Inhalter an der Theorie an an der Praxis?**

D'Membere vum *Groupe de support opérationnel* (GSO) kruten eng spezifesch formatioun vu 16 Stonnen, opgedeelt a 4 Stonnen Theorie an 12 Stonne praktesch Formatioun. Dësen Horaire entsprécht den Ufuerderungen un d'Matière an och de Recommandatioune vum Hiersteller vum PIE.

D'Formatioun besteet aus folgenden theoretischen a prakteschen Übungen :

- *théorie sur PIE T10;*
- *règles de sécurité ;*
- *manipulation et l'utilisation du PIE;*
- *exercices de simulation ;*
- *exercices d'application ;*
- *exercices de déploiement réel ;*
- *exercices de réaction ;*
- *apprentissage en ligne.*

Zousätzlech zu deene Couren absolvéieren d'Membere vum GSO e reegelméisseg *Virtual Reality Training* am Kontext PIE.

5. **Wéi ginn d'Gesondheitsrisiken am Zesammenhang mam Asaz vun engem Taser bewäert, besonnesch bei Persoune mat Virekrankungen oder Häerzproblemer? Wat sinn d'Uweisung fir d'Handele vu Polizisten an dëse Situatiounen?**

Laut de Recommandatioune vum Fournisseur, soll de PIE net géint Persoune geriicht ginn, déi als besonnesch vulnerabel gëllen, wéi eeler Leit oder schwanger Fraen a Kanner.

Ausserdeem ass de Gebrauch vum PIE verbueden a Situatioune mat erhéichter Gefor vun Nieweverletzungen (z.B. wann eng Persoun sech héich iwwert dem Buedem befënnt oder onsécher steet, wéi openger Trap, engem Balcon, wann se um Vëlo oder mam Auto fiert).

Nodeems de PIE zum Asaz kouw, gëtt déi betraffe Persoun direkt securiséiert an opgefuerdert um Buedem leien ze bleiwe fir ze vermeiden, dass si e Malaise mécht oder fält. Falls si dono freet oder opfälleg medezinesch Symptomer optrieden, gëtt si bei en Dokter bruecht. Falls et sollt zu engem medezineschen Noutfall kommen, sinn d'Membere vum GSO an éischer Hëllef ausgebild a kënnen déi néideg Mesuren aleede bis d'Ambulanz antrëfft.



LE GOUVERNEMENT
DU GRAND-DUCHÉ DE LUXEMBOURG
Ministère des Affaires intérieures

Lëtzebuerg, den 9. Mäerz 2026
Den Inneminister,
(s.) Léon Gloden